

Abdías

Ni amatapohuali quiijuilo nopa tajtolpanextijquet Abdías. Pero amo teno más tijmatij ten ya. Itoca quiijosnequi “itequipanojca TOTECO”. Ni amatapohuali techyolmelahua ten nopa tamanti cati nopa masehualme ten tali Edom quinchihuilijque tali Judá ehuaní quemá ya huetzqui Jerusalén. Nopa Edom ehuaní quinpalehuijque cati quisosoljque Jerusalén, huan teipa quintachtequilijque huan moaxcatijque nopa quentzi masehualme cati mocajque ipan nopa tali.

Abdías quiyiya ome partes:

Abdías 1—14 TOTECO quintatzacuilitis tali Edom ehuaní.

Abdías 15—21 TOTECO quintamilitis tali Edom, pero quicualtalis tali Judá.

TOTECO quiehcapan tali altepet Edom

¹Ya ni nopa tanextili cati na niAbdías niquitac. Ipan ni tanextili TOTECO cati to-Dios quinexti taya panos teipa ica tali Edom huan cati nozona ehuaní.

Tijcactoque se camanali cati huala ten TOTECO cati quiijtóhua para quitiñantoya se itatitanil ipan nochi talme para quinihuiti: “Ximoquetzaca huan ximocualtalica para anquitehuitij tali Edom huan imasehualhua. Ma tijtamisosolose.”

[TOTECO quej ni quinihúa tali Edom ehuaní:] ²“Nijchihuas para amotal elis pisiñtzi ipan nochi sequinoc talme huan nochi tahuel amechcualançaitase. ³Nelía anmohueyimatij pampa anmochantijtoque nozona huejcapa ipan huejhueyi teme. Ipan amoyolo anmoihúañ para amo aquí quiyiya chichualisti para huelis amechtepexihuis hasta talchi. Pero nelía hueyi anmocajcayajtoque. ⁴Pampa masque anpatanise tahuel huejcapa quej se cuatojti huan anquitalise amotepasol campa sitalime, na nimechtepexihuis ten nozona.” Quej nopa TOTECO quiijtóhua.

⁵“Sinta hualajtosquíañ tachtequini ica tayóhua para amechtachtequilise, amo quihuicatosquíañ nochi cati anquiyiyaj. Quemá masehualme cati pixcay ipan se xo-

comeca mili, nochipa quicajtehuaj se ome quechti. Pero amo quej nopa elis ica amotal. Quemá amocualançaitacahua hualase, quitamisosolose amotal hasta amo teno mocahuas. ⁶Amechtachtequilise ipan nochi cati anquiyiyaj masque amo nesi. Huan nochi tamanti cati pajpatiyó cati anquitiñtoque quitemose hasta quipantise huan quihuicase. ⁷Nochi talme cati amechpalehuiyayaj amechcualançaitase huan quinpalehuisse para amechquixtise ten amotal. Achtohui amechilhuisse para amechpalehuisse para anquiyiyase tasehuilisti, pero amo cana. Inijuanñ ya mocualtalíañ para amechtzontamilitise. Amohuampoyóhua amechcaycayahuase. Cati tacuayayaj amohuaya amechtalilise taquetzti para ximasica. Eltoc pampa amojuanñ cati anEdom ehuaní tahuel anhuihuitique huan amo anquimatij taya onca.

⁸“Ipan nopa tonali quemá nimechtatzacuilitis ayecmo itztos yon se talnamijca tacat ipan tali Edom pampa nochi talnamiquini niquintamilitis ten nopa tepeme campa hueli ipan amotal.” Quej nopa TOTECO quiijtóhua. ⁹“Huan amojuanñ cati anehuaní ipan altepet Temán ica nochi amosoldados cati tahuel motemacaj, anhuihuipicase ica majmajti. Huan nochi

masehualme ten nopa tepeme ipan tali Edom, nochi miquise.

Inintajtacolhua nopa Edom ehuaní

10 “AnEdom ehuaní anquiselise tatzacuiltli pampa anmosisnijque ica amoteixmatcahua cati iteipa ixhuihua Jacob. Yeca nochi amotajtacolhua mopanextis para nochi ma quiiaca. Huan amojuanti anhuetzise ipan se hueyi pinahualisti huan nimechixpolihuiltis para nochipa. 11 Pampa anquintahuelcajque amoisraelita icnihua quema itztoyaj ipan taohuicayot. Amo anquinpalehuijque quema nopa tatehuiani hualajque para quinichtequilise nochi cati quipixtoyaj; huan quema mahuiltijque huan moxelhuilijque nopa altepet Jerusalén. Amojuanti san anmochijque quej se inincualancaitaca.

12 “Amo quinamiquiyaya anquichijtosquíaj cati anquichijque. Amo quinamiqui san antachixtoyaj huan amo teno anquichijque quema seyoc tali ehuaní quintachtequiliyayaj israelitame. Amo quinamiquiyaya anquinhuetzquilijque nopa israelitame cati tali Judá ehuaní quema quitemohuayayaj tapalehuili. Amo quinamiquiyaya anmotepanitase quema injuanti tahuel taijyohuiyayaj. 13 Amo quinamiqui ancalajque ipan inintal noisraelita masehualhua para anquichtequilijque quema quinajsiyaya cati fiero. Amo quinamiqui anquinmahuisojque quema sequinoc quisosolohuayayaj nochi cati quipixtoyaj. Amo quinamiqui anquichtequilijque iniricojyo cati mocajtoya para anmoricojchihuase por inintaohuicayo. 14 Amo quinamiqui anmoquetzque campa ojmaxali para anquintzontamiltise israelitame cati cholohuayayaj. Huan ipan nopa tonali quema quinitzquiyayaj, amo quinamiquiyaya anquintzquise nomasehualhua cati noja mocajtoyaj yoltoque huan anquintemactilijque inimaco inincualancaitacahua.”

Se tonali TOTECO quitamiltis Edom huan quicualtis Israel

15 [TOTECO quiijtouhua:] “Nechcatitoc nopa tonali ten noaxca, niininTECO israel-

itame, nimonextis huan nitetajtolsecahuas, huan anEdom ehuaní anquiselise amotaxtahuil. Ipan nopa tonali niquincuepilis nochi talme ica cati fiero quichijtoque. Huan amojuanti ipan tali Edom, amechchihuilise san se quej anquinchihuilijtoque israelitame. Nochi cati anquichijtoque, nojquiya amechajsis amojuanti. 16 Amojuanti ten tali Edom anquintamiltijque nomasehualhua ipan notepe tatzetzceloltic ipan Jerusalén. Huajca ama amojuanti huan nochi sequinoc talme ehuaní quiselise amotatzacuiltli. Quej se ihuintiquet cati tai, eltos quej anquise nopa tatzacuiltli huan anmomimilojtinemise quej anihuintini huan antamiixpolihuisse. Elis quej amo quema anitztoyaj.

17 “Pero Jerusalén^a elis campa momanahuisse se quesqui israelitame cati noja mocahuase yoltoque, huan nozona elis tatzetzceloltic. Huan israelitame sempa moaxcatise inintal huan iniricojyo. 18 Ipan nopa tonali israelitame quipiyase chichahualisti quej se tit o se hueyi tilelemecti, pero teipa amojuanti cati anixhuihua Esaú anelise quej tasoli cati huactoc huan amechtamatise hasta anelise san cuajnexti. Huan amo mocahuas yoltoc yon se cati iteipa ixhuihua amohuejcapan tata Esaú pampa quej nopa quiijtojtoc TOTECO.

19 “Huan huajca nopa israelitame cati itztoque ipan tali Neguev moaxcatise nopa tepeme ten tali Esaú. Huan israelitame cati itztoque campa tamayamit ipan tali Judá moaxcatise inintal nopa filisteojme. Nojquiya moaxcatise tali Efraín huan Samaria. Huan iteipa ixhuihua Benjamín moaxcatise tali Galaad. 20 Huan israelitame cati quinitzquijque inincualancaitacahua mocuepase huan moaxcatise inintal nopa cananeos hasta tali Sarepta. Huan nopa israelitame cati quinitzquijque ten altepet Jerusalén mocuepase huan moaxcatise nopa altepeme ten tali Neguev. 21 Pampa nopa tamanahuiani itztose ipan tepet Sion huan tanahuatise ipan nochi tali Edom. Huan na cati niininTECO israelitame nielis nitanahuatijquet.”

^a0:17 O tepet Sion.